


3511(02)
x. 22
G.Nazarova, X.Xalilov,
A.Azimov, I.Xanova

XALQARO IQTISODIY INTEGRATSIYA



Mas'ul muharrir: prof. A.Sh. Bekmurodov

Taqrizchilar:

B.A. Baxriddinov – Jahon iqtisodiyoti va diplomatiya universiteti professori

A.A. Eshtayev – TDIU «Jahon iqtisodiyoti va XIM» kafedrasida dotsenti

Jahon xo'jaligining barcha jabhalarida integratsiya va globallashuv jarayonlari kuchayib borayotgan bir davrda dunyo mamlakatlarining asosiy rivojlanish tendensiya va yo'nalishlarini aniqlab olish muhim ahamiyat kasb etadi.

Jahon iqtisodiyotida integratsion jarayonlarning rivojlanish alomatlari o'zgarib borayotgan bir davrda O'zbekiston Respublikasi ham jahon hamjamiyatiga chuqur integratsiyalashib, ushbu mamlakatlar bilan ijtimoiy-iqtisodiy, siyosiy va madaniy sohalaridagi munosabatlarini tobora kengaytirib bormoqda. Jahonning yirik integratsion markazlari rivojlanishining ijobiy va salbiy tomonlarini o'rganishdagi yondashuvlar respublikamiz iqtisodiyotida muhim ahamiyatga ega.

Darslik magistr-talabalar, aspirant, ilmiy xodimlar va shuningdek, xalqaro iqtisodiy integratsiya jarayonlarini o'rganuvchi keng kitobxonlar ommasiga mo'ljallangan.

KIRISH

Jahon xo'jaligining tobora globallashib borishi jarayonlari negizini mamlakatlar iqtisodiyotining o'zaro integratsiyasi ta'minlamoqda. Ushbu integratsion jarayonlarning aksariyati yirik mintaqalar miqyosida va, shuningdek, ayrim uyushmalar darajasida namoyon bo'lmoqda-ki, bu jarayonlarning shakllanishi va rivojlanishida sanoati yuqori darajada rivojlangan davlatlarning iqtisodiyoti va salohiyati hal qiluvchi ahamiyat kasb etmoqda.

Ushbu jarayonlarni bilish va mohiyatini tushunib yetish, O'zbekistonning jahon hamjamiyatiga kirib borishini jadallash-tirish va xalqaro iqtisodiy aloqalarini kengaytirishning samarali yo'nalishlarini belgilashda amaliy ahamiyatga egadir.

Respublikamiz Prezidenti I.A.Karimov ta'kidlaganidek: «XXI asr shubhasiz, xalqaro munosabatlarda butun dunyo qamrab olinadigan asr bo'ladi. Bunday sharoitda integratsiya jarayonini, xalqaro institutlar va tashkilotlarda suveren davlatlarning ishtirok etishini kengaytirish jarayonini faqat tarix taqozosi deb emas, balki ayrim mintaqalar ko'lamida ham, shuningdek, umuman – butun sayyoramiz ko'lamida ham sobitqadamlik barqarorlikning qudratli omili deb hisoblamog zarur».¹

Bugungi kunda jahon xo'jaligi tizimiga integratsiyalashmay turib, hech bir mamlakat mukammal rivojlana olmaydi. Jahon iqtisodiyotida milliy xo'jaliklarning baynalmilallashuvi ishlab chiqaruvchi kuchlar rivojining zaruriy tomonlaridan biri bo'lib, u barcha mamlakatlarni, ular qaysi siyosiy, ijtimoiy-iqtisodiy tizimga mansubligidan qat'iy nazar, qamrab oladi.

¹ I.A. Karimov .O'zbekiston XXI asr bo'sag'asida: xavfsizlikka tahdid, barqarorlik shartlari va taraqqiyot kafolatlari. T. 1997. 298-bet.

Jahon iqtisodiyotining baynalmilallashuvini. sifat jihatidan yangi holati (ko'rinishi) – iqtisodiy integratsiyadir. Xalqaro iqtisodiy integratsiya jahon mamlakatlari o'rtasida ishlab chiqarish va kapitalni baynalmilallashuvini tezlashishiga ham shart-sharoit yaratadi.

Biroq, ta'kidlash lozimki, jahon iqtisodiyotiga integratsiyalashuv va globallashuvning ijobiy tomonlari bilan bir qatorda muayyan ziddiyatli jihatlari ham mavjud. Jahon hamjamiyati bugungi kunda boshidan kechirayotgan moliyaviy inqiroz ham aynan shu ma'noda globallashuv jarayonlarining salbiy oqibati sifatida namoyon bo'ladi.

O'zbekiston Respublikasi Prezidenti I.A. Karimov quyidagilarni ta'kidlaydi: «Barchamiz bir haqiqatni anglab yetishimiz lozim – O'zbekiston bugun xalqaro hamjamiyatning va global moliyaviy-iqtisodiy bozorning ajralmas tarkibiy qismi hisoblanadi. ... Shu bois global moliyaviy inqiroz va, birinchi navbatda, uning oqibatlari iqtisodiyotimizning rivojlanishi va samaradorlik holatlariga ta'sir etayotganidan ko'z yumib bo'lmaydi»². Shunga ko'ra, biz mamlakatimizning xalqaro va mintaqaviy integratsiyalashuv jarayonlarida ishtirok etishida, jahon moliyaviy inqirozi oqibatlarining ta'sirini har tomonlama hisobga olishimiz. iqtisodiy rivojlanish dasturlarini ushbu jarayonlar ta'siri nuqtai-nazaridan shakllantirishimiz va ularni izchil amalga oshirishimiz taqozo etiladi.

«Xalqaro iqtisodiy integratsiya» kursining asosiy maqsadi zamonaviy jahon xo'jaligining muhim tendensiyalaridan biri hisoblangan integratsiya jarayonlarining o'ziga xos rivojlanish xususiyatlarini tahlil qilishdir. Talabalar ushbu kursni o'rganishlari davomida xalqaro iqtisodiy integratsiyaning mazmuni va mohiyatini, rivojlanish xususiyatlarini kompleks o'rganib, xalqaro integratsion guruhlarining tashkil topishi va amaliy ahamiyati to'g'risidagi qarashlar konsepsiyasiga ega bo'lishadi. Shuningdek, talabalar

² I.A.Karimov. Jahon moliyaviy-iqtisodiy inqirozi, O'zbekiston sharoitida uni bartaraf etish yo'llari va choralari. T.: «O'zbekiston», 2009. 4-bet.

ushbu kursni o'rganishda zamonaviy integratsion jarayonlarning rivojlanishida global muammolarni baholash mezonlari, Xalqaro iqtisodiy munosabatlarda integratsion jarayonlarning borishi to'g'risidagi tushunchalarga ham ega bo'ladilar. Talabalar G'arbiy Yevropa, Shimoliy Amerika, Osiyo – Tinch okeani mintaqasi va, shuningdek, jahonning boshqa integratsion markazlari to'g'risidagi bilimlarga ega bo'lishlari bilan bir qatorda, O'zbekiston Respublikasining jahon hamjamiyatiga integratsiyalashuvi kabi masalalarni ham alohida o'rganadilar.

«Xalqaro iqtisodiy integratsiya» fani o'quv rejasidagi bir qator iqtisodiy fanlar – «Jahon iqtisodiyoti», «Xalqaro iqtisodiy munosabatlar», «Xorijiy mamlakatlar iqtisodiyoti», «Jahon iqtisodiyotining globallashuvi», «Xalqaro savdoning rivojlanish tendensiyasi» va shuningdek, «Iqtisodiy nazariya», «Iqtisodiy ta'limotlar tarixi» kabi bir qator ijtimoiy – gumanitar fanlar bilan ham uzviy bog'liq holda o'rganiladi.

«Xalqaro iqtisodiy integratsiya» fanini, TDIUning magistratura bo'limida 5A341101 – «Xalqaro iqtisodiy munosabatlar» mutaxassisligi bo'yicha o'qiyotgan talabalar o'rganishadi. Ushbu fan mutaxassislik fanlaridan biri bo'lib, talabalar fanni yaxshi o'zlashtirishi uchun ko'p yillik pedagogik tajribaga ega bo'lgan professor o'qituvchilarning ma'ruzalarini tinglash bilan bir qatorda chop etilgan ko'plab ilmiy va monografik ishlarni, maqolalarni chuqur o'rganishlari, jahon xo'jaligidagi integratsion jarayonlarning hududiy va xalqaro miqyosda borishini tahlil qilishlari ham lozim.

«Xalqaro iqtisodiy integratsiya» fani bo'yicha darslikni tayyorlashda TDIU «Xalqaro iqtisodiyot» kafedrasida professor-o'qituvchilari, i.f.d., professor G.G'.Nazarova, i.f.n., dotsent X.X.Xalilov, i.f.n., dotsent A.E.Azimov, i.f.n., dotsent I.M.Xanovalar ishtirok etdilar. Darslik birinchi bor kafedraning professor-o'qituvchilari tomonidan yaratilayotganligi tufayli ba'zi bir juz'iy kamchiliklar bo'lishi mumkin. Ushbu darslikni tayyorlashda o'zlarining qimmatli maslahatlari, ijobiy va tanqidiy fikrlarini ber-

gan professor-o'qituvchilarga, shuningdek texnik ishlarni bajarishda yaqindan yordam bergan TDIU katta o'qituvchisi Z.M.Iminov, assistent X.Shukurovga hamda magistrantlar T.Esanov, F.Saidnazarov va O.Ulug'ovalarga mualliflar o'z minnatdorchiligini bildiradilar.

Darslikning kirish, 1,3,5- boblari professor G.G'.Nazarova va dotsent X.X.Xalilovlar, 2,4,6,7- boblari esa dotsentlar A.E.Azimov va I.M.Xanovalar tomonidan tayyorlandi.

1-BOB. XALQARO IQTISODIY INTEGRATSIYA – JAHON IQTISODIYOTI VA XALQARO IQTISODIY MUNOSABATLAR TIZIMIDA

1.1. Xalqaro iqtisodiy integratsiyaning mazmuni va mohiyati

Jahon xo'jaligi rivojining zamonaviy bosqichida sayyoramizning barcha qit'alarida integratsion jarayonlarning turli shakllarini ko'rishimiz mumkin.

XX asrning ikkinchi yarmidan boshlab yetakchi industrial mamlakatlarning tez taraqqiy etishi, shuningdek, xalqaro transport va kommunikatsiya vositalarining takomillashuvi natijasida xalqaro tovar va xizmatlarning yuqori sur'atlarda rivojlanishi yuz berdi. Xalqaro savdo bilan bir qatorda ishlab chiqarish omillarining (kapital, ishchi kuchi va texnologiyalar) xalqaro harakati ham rivojlanib bordi. Ya'ni, tayyor mahsulot bilan bir qatorda ishlab chiqarish omillari ham mamlakatlararo ko'cha boshladi. Tovlar bahosida o'z aksini topgan foyda nafaqat milliy chegara doirasida, balki xorijda ham yaratildi. Bularning barchasi iqtisodiy integratsiyaning vujudga kelishiga zamin yaratdi.

Iqtisodiy integratsiya – mamlakatlar o'zaro iqtisodiy hamkorligining natijasi bo'lib, u xo'jalik mexanizmlarining yaqinlashuviga olib keladi va bu yaqinlashuv davlatlararo bitimlar shaklini oladi hamda tegishli davlatlararo organlar tomonidan tartibga solinadi.

Xalqaro iqtisodiy integratsiya bu – milliy xo'jaliklar (davlatlar) o'rtasida ko'p tomonlama o'zaro barqaror aloqalarning rivojlanishi va mehnat taqsimoti negizida yuzaga kelgan mamlakatlarning iqtisodiy, ijtimoiy-siyosiy va madaniy jihatdan birlashuvi bo'lib, ishlab chiqarish tarmoqlarining turli darajada va turli ko'rinishdagi o'zaro aloqadorligini ifoda etadi.

Hozirgi kunda integratsion jarayonlar to'g'risida mutaxassislar orasida yagona qarashlar konsepsiyasi mavjud emas. Bir guruh

iqtisodchi olimlar integratsiyani jahon mamlakatlari o'rtasida yangi tovarlar oqimini shakllantirish orqali «resurslar cheklanganligi» muammosini bartaraf etish yo'li deb talqin etishsa (bu orqali jahon mamlakatlarida nisbatan serxarajat tovarlar ishlab chiqarishga chek qo'yilib, texnologik ayirboshlashni kengaytirish imkoniyatini beradi, ya'ni, ilmiy-tadqiqot va tajriba konstruktorlik ishlari (ITTKI)ga xarajatlarni kamaytirish imkonini beradi), boshqa bir guruh olimlar integratsiyani talab etuvchi dastlabki turtki sifatida noiqtisodiy omillarni ilgari suradi (masalan, mamlakat mudofaa qobiliyatini mustahkamlash va boshqalar). Uchinchi bir guruh iqtisodchilar esa integratsiya bu – ishlab chiqarishning barqaror o'sishi, ijtimoiy-iqtisodiy va siyosiy barqarorlik kabi maqsadlarga yengilroq va tezroq erishish imkoniyatini beradi, deb hisoblashadi. Xullas, u yoki bu nazariy yondashuvlarni umumlashtirgan holda shuni qayd etib o'tish kerakki, integratsiya bu – hududiy miqyosda sifat jihatidan yangi iqtisodiy muhitni yaratish yo'li orqali milliy xo'jalik komplekslarining o'zaro yaqinlashishi va bir-biriga kirib borishi jarayonidir.

Jahon iqtisodiyoti va xalqaro iqtisodiy munosabatlar tizimida integratsion jarayonlar asosan ikki darajada (mikro – transmilliy korporatsiyalarning tashkil etilishi orqali, makro – iqtisodiy siyosatni davlatlararo muvofiqlashtirish siyosati orqali) amalga oshiriladi.

Mikro darajadagi integratsion jarayonlar bir-biriga hududiy jihatdan yaqin joylashgan mamlakatlarning xo'jalik yurituvchi subyektlari kapitallarining o'zaro ta'sir doirasi orqali amalga oshiriladi. Ya'ni, ushbu davlatlar o'rtasida integratsion jarayonlar iqtisodiy bitimlar tizimining shakllanishi, kichik shoxobchalar, shu'ba korxonalar tashkil etilishi orqali yuz beradi. Tashkil topgan korxonalar va firmalar o'rtasidagi o'zaro iqtisodiy aloqalarning tez rivojlanishi tovar almashuvini, xizmat sohaslarini, kapital va ishchi kuchining mamlakatlararo erkin harakatini ta'minlashga, ijtimoiy-iqtisodiy va ilmiy-texnologik, tashqi iqtisodiy va mudofaa.

moliyaviy va valyuta sohasida yagona siyosatni o'tkazish zaruriyati tug'iladi. Yagona valyuta va moliyaviy fondlar, infratuzilmalar va umumiy davlatlararo boshqaruv organlariga ega bo'lgan iqtisodiy majmualar yaratiladi.

Makro darajada esa integratsiya davlatlarning iqtisodiy birlashmalarini shakllantirish hamda milliy siyosatlarni muvofiqlashtirish asosida ro'y beradi.

Iqtisodiy integratsiya asosida bir qator obyektiv omillar yotadi, ularning ichida quyidagilar muhim ahamiyat kasb etadi:

- xo'jalik hayotining yanada baynalmilallashuvi;
- xalqaro mehnat taqsimotining chuqurlashuvi;
- umumjahon ahamiyatga ega bo'lgan ilmiy-texnika inqilobi (ITI);
- milliy iqtisodiyotlar ochiqlik darajasining kuchayishi va boshqalar.

Ushbu obyektiv omillarning barchasi jahon iqtisodiyoti va xalqaro iqtisodiy munosabatlar tizimida bir-birlari bilan chambarchas bog'liq holda o'zaro aloqadorlikda rivojlanib boradi.

Baynalmilallashuv omili mamlakatlar o'rtasida barqaror iqtisodiy aloqalarning rivojlanishi va takror ishlab chiqarishning milliy xo'jalik doirasidan chetga chiqish jarayonini aks ettiradi (eng avvalo, xalqaro mehnat taqsimoti asosida). Jahon xo'jalik hayoti baynalmilallashuvining o'sishi va rivojlanishida TMKlarning ta'sir doirasi katta. YuNKTAD ma'lumotiga ko'ra hozirgi kunda jahonda 65 mingdan ortiq TMKlar va ularning 850 mingdan ortiq shoxobchalari va shu'ba korxonalari faoliyat ko'rsatib kelmoqda.

Jahon xo'jaligida xalqaro iqtisodiy integratsiyaning rivojlanishiga ta'sir etuvchi ikkinchi omil – xalqaro mehnat taqsimoti tuzilmasidagi chuqur o'zgarishlardir (bu asosan ITI ta'sirida yuz beradi). Xalqaro mehnat taqsimoti atamasi, bir tomondan, mamlakatlarning muayyan mahsulotlar ishlab chiqarishga ixtisoslashuvini bildirsa, ikkinchi tomondan, ishlab chiqarish

majburiyatlarning firma ichida va firmalararo taqsimlanishida o'z ifodasini topadi.

Umumjahon ahamiyatga ega bo'lgan ilmiy-texnik inqilobning hozirgi bosqichi baynalmilallashuvni ham bozor, ham ishlab chiqarish sohasida sifat jihatidan yangi bosqichga olib chiqishda muhim rol o'ynamoqda. ITI tashqi iqtisodiy aloqalarning ijtimoiy takror ishlab chiqarishdagi roli oshishini ta'minlovchi muhim omildir. ITI u yoki bu mamlakatda boshqalardan ajralgan holda to'laqonli rivojlana olmaydi.

Jahon xo'jaligida mamlakatlarning iqtisodiy aloqalarga yanada chuqurroq kirib borishida milliy davlatlar iqtisodiyotining ochiqlik darajasi muhim rol o'ynamoqda. Turli mamlakatlarga tegishli firmalarning kooperatsiyalashuvi natijasida ishlab chiqarish va investitsiyalar sohasida yirik xalqaro muammolar kelib chiqmoqda. Milliy davlatlarda ochiq iqtisodiyotning shakllanishida eksportga yo'naltirilgan ishlab chiqarishni rag'batlantirish ishlari bo'yicha olib borilayotgan tashqi iqtisodiy strategiyasi muhim ahamiyat kasb etmoqda. Bunda, albatta xorijiy mamlakatlardan kapital va ilmiy texnologiyalar, malakali mutaxassislarning kirib kelishiga imkon beruvchi huquqiy asoslarni yaratilishi ham katta ahamiyatga ega bo'ladi.


Iqtisodiy integratsiyaning rivojlanishi muayyan shart-sharoitlarining mavjud bo'lishini ko'zda tutadi. **Birinchi**dan, integratsiyalashayotgan mamlakatlarning iqtisodiy rivojlanishi va bozor munosabatlaridagi yetukligi darajasi bir-biriga yaqin bo'lishi kerak. Xo'jalik mexanizmlari bir-biriga mos tushishi lozim. Kamdan-kam istisnolardan tashqari, barcha hollarda davlatlararo integratsiya industrial mamlakatlar yoki rivojlanayotgan mamlakatlar o'rtasida taraqqiy topadi. Sanoati rivojlangan mamlakatlar doirasida integratsion jarayonlar eng faol bo'ladi va yuqori samara beradi. Rivojlanish darajasi turlicha bo'lgan mamlakatlar o'rtasida integratsion jarayonlar kamdan-kam hollarda yuz beradi. Sanoati rivojlangan va rivojlanayotgan

mamlakatlar o'rtasida o'zaro integratsiyalashuv harakatlari yuz bersa-da, bu jarayonlar hozirgi kunda ham o'zining ilk rivojlanish bosqichida turibdi.

Ikkinchidan, integratsiyalashayotgan mamlakatlarning geografik yaqinligi, ko'p hollarda umumiy chegara va tarixan shakllangan iqtisodiy aloqalarning mavjudligi. Aksariyat hollarda bir mintaqada bir-biriga geografik jihatdan yaqin joylashgan mamlakatlar birlashadilar, chunki ular uchun transport, til va boshqa muammolarni yechish oson kechadi. **Uchinchi**dan, rivojlanish, siyosiy, iqtisodiy hamkorlik sohasida va mamlakatlar oldida turgan boshqa muammolarning umumiyliigi. Bu muammolarni hal etish integratsiyalashayotgan mamlakatlarning birgalikdagi harakatlarini taqozo etadi. Asosiy muammosi – bozor iqtisodiyotining asoslarini yaratish bo'lgan mamlakatlarning umumiy valyutani joriy qilishni maqsad qilib qo'ygan davlatlar bilan integratsiyalashuvi mumkin emasligi bunga misol bo'la oladi.

To'rtinchidan, integratsion birlashmalarni tuzgan davlatlarda odatda ijobiy iqtisodiy siljishlar (iqtisodiy o'sish sur'atlarining tezlashuvi, Inflyatsiyaning pasayishi, ish bilan bandlikning o'sishi va shu kabilar) ro'y beradi va bu, shubhasiz, o'zgarishlarni kuzatib borayotgan boshqa mamlakatlarga muayyan ta'sir ko'rsatadi va ularni interasion jarayonlarda ishtiriok etishga rag'batlantiradi. **Beshinchi**dan, u yoki bu mintaqadagi mamlakatlarning ko'pchiligi integratsiyaviy birlashmaga a'zo bo'lgach, bu birlashma doirasidan chetda qolgan mamlakatlar, shubhasiz, ba'zi qiyinchiliklarga duch keladi. Bu qiyinchiliklar mazkur guruhga kiruvchi mamlakatlar iqqisodiy aloqalarining uzviyligi bilan bog'liqdir. Bu ko'pincha, hatto, integratsiya doirasidan tashqarida qolishdan qo'rqib, integratsiya doirasidan chetda qolgan mamlakatlar bilan savdoni qisqartirishga ham olib keladi. Integratsiya jarayonidan chetda qolgan mamlakatlar ko'p hollarda qo'shimcha qiyinchiliklarga duch keladilar. («Domino samarasi»).

Hozirgi kunda xalqaro iqtisodiyotda yuzaga kelayotgan va rivojlanayotgan ko'plab integratsion birlashmalar aslida o'z



1-rasm. Xalqaro iqtisodiy integratsiya: mohiyati, maqsadlari va bosqichlari.

oldiga bir-biriga o'xshash maqsadlarni qo'yadilar. *Birinchi*dan, ishlab chiqarish ko'lamini ko'paytirish hisobiga bozorlar hajmini kengaytirish, transaksion xarajatlarni kamaytirish va boshqa bir qator afzalliklardan foydalanish. Bu, o'z navbatida, katta hajmdagi bozorlarga ishtiyoq bilan kirib keladigan to'g'ridan-to'g'ri chet el investitsiyalarini jalb qilishga bevosita imkon beradi. *Ikkinchi*dan, qulay tashqi iqtisodiy va siyosiy muhitni yaratish. Ko'plab integratsion birlashmalarning muhim maqsadi ularda ishtirok etuvchi davlatlar bilan iqtisodiy, siyosiy, harbiy, ijtimoiy, madaniy va boshqa sohalarda hamkorlikni mustahkamlashdir. *Uchinchi*dan, savdo siyosatidagi vazifalarni hal qilish. Mintaqaviy integratsiya, ko'pincha, JST doirasida ishtirok etayotgan mamlakatlarning muzokarasi nuqtai nazaridan olib qaraladi. Mamlakatlar bloki nomidan kelishilgan holdagi bayonot ancha jiddiy hisoblanadi va savdo siyosati sohasida kutilgan natijalarni beradi. *To'rtinchi*dan, iqtisodiyotni tuzilmaviy qayta qurishga ko'maklashish. O'z qo'shnilarini integratsiya jarayonlariga qo'shar ekanlar, rivojlanganroq davlatlar ham o'sha mamlakatlarda to'laqonli va katta hajmli bozorlarni yaratish hamda ulardagi bozor islohotlarining ildiz otishidan manfaatdor bo'ladi. Yevropa Ittifoqiga yangi a'zolarni qo'sha turib, ko'plab G'arbiy Yevropa mamlakatlari shu maqsadlarni ko'zlagan edi. *Beshinchi*dan, mintaqaviy raqobat ustunliklarini shakllantirish hisobiga, birlashmada ishtirok etuvchi mamlakatlarning jahon bozoridagi pozitsiyalarini kuchaytirish.

Integratsion birlashmaga qo'shiluvchi davlatlar o'zaro aloqalar olib boruvchi hamkorlarga xos umumiy jarayonlarni boshidan kechira boshlaydi. Integratsiya jarayonlari jahonning barcha qit'alarini qamrab olmoqda. Buning natijasida ko'plab mintaqaviy va submintaqaviy savdo-iqtisodiy tashkilotlar yuzaga kelmoqda. (1- jadval). JST ma'lumotlariga ko'ra 2004-yilda jahonda 151 ta haqiqatda faoliyat ko'rsatayotgan mintaqaviy savdo-iqtisodiy kelishuvlar mavjud edi.

Jahon xo'jaligining asosiy mintaqalaridagi iqtisodiy integratsion tashkilotlar

№	Tashkilot nomi	A'zolar soni	Tuzilgan yili
1	Yevropa Ittifoqi (YeI, ingl. EU, oldingi nomi Yevropa Iqtisodiy Hamjamiyati)	27	1957/1992
2	Yevropa Erkin Savdo Assosiasiyasi (YeESA, ingl. EFTA)	4	1960
3	Markaziy Yevropa Erkin savdo hududi (ingl. Central European FTA)	7	1992
4	Mustaqil Davlatlar Hamdo'stligi (MDH, ingl. CIS)	12	1991
5	Qora dengiz iqtisodiy hamkorligi (QDIH, rus. ЧЭС)	11	1992
6	Shimoliy Amerika erkin savdo hududi to'g'risidagi kelishuv (ingl. NAFTA)	3	1994
7	Osiyo-Tinch okeani iqtisodiy hamkorligi Forumi (OTIH ingl. APEC)	21	1989
8	Janubi-Sharqiy Osiyo davlatlari Assosiasiyasi (ingl. ASEAN)	10	1967
9	Janubiy Osiyo mintaqaviy hamkorligi (ingl. SAARK)	7	1985
10	Lotin Amerikasi integratsiya Assosiasiyasi (LAIA, ingl. LAIA)	11	1980/1960
11	And pakti (Andean Pact)	5	1969
12	Karib Hamjamiyati va Karib Umumiy bozori (CARICOM)	14	1973
13	Janubiy konus mamlakatlari umumiy bozori (ingl. MERCOSUR)	4	1991
14	G'arbiy Afrika mamlakatlari iqtisodiy hamjamiyati (ECOVAST)	16	1976

15	Sharqiy va Janubiy Afrika umumiy bozori (ESFCM)	20	1994
16	Janubiy Afrika rivojlanish hamjamiyati (SADK)	11	1992
17	Markaziy Afrika bojxona va iqtisodiy Ittifoqi (ingl. UDEAK)	6	1966
18	Arab iqtisodiy birligi Kengashi (AIBK)	12	1964
19	Fors ko'rfazi arab davlatlari hamkorligi Kengashi (FKADHK)	6	1981

Manba: Mualliflar tomonidan tuzilgan.

1.2. Iqtisodiy integratsiya: nazariy qarashlar tahlili

Yevropa hamjamiyati yuzaga kelgunga qadar iqtisodiyot fanida «iqtisodiy integratsiya» atamasi madjud emas edi. Biroq, milliy davlatlar orasidagi «bozorlar integratsiyasi» va «siyosat integratsiyasi» kabi jarayonlar uzoq yillardan beri mavjud bo'lib kelgan. Yagona milliy bozorlar savdoning stixiyali rivojlanishi va mehnat taqsimoti natijasida shakllandi. Bu jarayonlarning yuqori bosqichini birlashgan xalq xo'jaligi tizimlarining yuzaga kelishida ko'rish mumkin.

Yevropa mamlakatlari integratsiyalashuvi yo'li ham shu yo'ldan bordi. Ya'ni, yagona ichki bozor yaratilib, uzoq-yillar davomida Yevropa hamjamiyati bo'ylab yagona iqtisodiy qonunchilik tizimi va yagona (yoki hech bo'lmaganda uyg'unlashgan) iqtisodiy siyosat olib borildi. Biroq, alohida olingan bir milliy davlat ichidagi birlashtiruvchi jarayonlar bilan davlatlararo birlashtiruvchi jarayonlar orasida sifat jihatidan jiddiy farqlar ham yo'q emas.

Milliy bozorlarni birlashtirish yo'lida shaxslar va alohida hududlarning qiziqishlari orasida farqlar mavjud bo'lib, ular yagona siyosiy hokimiyat tomonidan nisbatan osonlik bilan bartaraf etib

turilgan. Yevropa integratsiyalashuvining asosiy maqsadi – milliy davlatlarni yagona qudratli davlatlar ko‘rinishida birlashtirish uchun uzoq yillar davomida boshlang‘ich omilsiz millatlar va milliy davlatlarning qarama-qarshi iqtisodiy qiziqishlari va iqtisodiy mustaqilligi kabi jiddiy to‘siqlarni yengib o‘tishga to‘g‘ri kelgan edi. Shuning uchun ham Yevropa integratsiyasining iqtisodiy mazmuni va mohiyatini ochib berishda Yevropani milliy davlatlar doirasida birlashtirishga «yuqoridan» qaraganda juda murakkab va boy tajribaga ega bo‘lishi ma‘lum edi.

G‘arb iqtisodiyoti fani Yevropa integratsiyasining g‘oyaviy manbasi sifatida namoyon bo‘lmaydi. Iqtisodchilar tomonidan integratsiya voqelik sifatida u iqtisodiy reallikning asosiy qismiga aylanishi zahotiyoq o‘rganila boshlandi.

Huquqshunos va siyosatshunos olimlar Yevropa integratsiyalashuvining o‘ziga xos taraflarini o‘rganishda, dunyoda ro‘y berayotgan jarayonlarni esdan chiqargan holda, to‘lig‘icha o‘rganishga harakat qilgan bo‘lsalar, iqtisodchilar esa bundan farqli ravishda, dunyo bozorining universal rivojlanish falsafasini o‘rganishdi. Ya‘ni ular integratsiyaning umumiy, butun bir jahon xo‘jaligining rivojlanish qonuniyatlari asosida namoyon bo‘lishiga e‘tibor qaratishdi.

Integratsiya muammosiga boshlang‘ich nazariy yondoshuvlar xalqaro savdoning umumiy nazariyasi yo‘nalishida rivojlangan edi.

G‘arb iqtisodiyoti fani savdoni an‘anaviy tarzda boyliklar orttirishning manbai deb hisoblaydi. Shuning uchun, savdo hajmini kengaytirishga olib keluvchi har bir narsa absolyut farovonlikdir, va aksincha uning rivojlanishiga xalaqit qiluvchi har bir narsa jamiyat boyligidan chegirmadir, degan fikrni bildiradi. Ushbu paradigma doirasida nazariy jihatdan mumkin bo‘lgan besh xil shakldagi hududiy iqtisodiy integratsiyani o‘rganish maqsadga muvofiq bo‘lib, ular quyidagilardan iborat:

- Erkin savdo hududlari – o‘zaro tovarlar savdosida har qanday to‘siqlarni olib tashlagan bir guruh mamlakatlar.

- Bojxona ittifoqi – tashqi tariflari umumiy bo‘lgan erkin savdo hududi.

- Umumiy bozor – bunda bojxona ittifoqi hamda kapital va ishchi kuchining erkin harakat rejimini ko‘rishimiz mumkin.

- Iqtisodiy ittifoq – umumiy bozor va uni to‘ldiruvchi omillar-ning erkin harakatini ta‘minlash maqsadida iqtisodiy, ijtimoiy siyosatni uyg‘unlashtirish, tovar oqimlari buzilishini oldini olish maqsadida makroiqtisodiyotni uyg‘unlashtirishdir.

- Iqtisodiy va valyuta ittifoqi – bu umumiy valyuta siyosati bilan to‘ldirilgan iqtisodiy ittifoqdir.

Ushbu shakllarning birortasi ham jahon xo‘jaligida sof ko‘rinishda real ijtimoiy-iqtisodiy hayotda hech qachon mavjud bo‘lmasa-da, bu kabi ko‘rinishdagi tasnif hozirgi kunda ilmiy jihatdan to‘la asoslab berilgan.

Ma‘lumki, zamonaviy integratsion tizimning shakllanishi, bojxona ittifoqi yaratilishidan boshlandi. Shu sababli, iqtisodiy integratsiyani nazariy jihatdan tushunishning boshlang‘ich urinishlarini uning shu ideal shaklidan boshlab o‘rganish maqsadga muvofiqdir.

GATT qoidalari har qanday cheklovlarisiz erkin savdo hududlari va bojxona ittifoqini tashkil etishga ruxsat berardi (XXIV modda). Bunga sabab, ushbu xalqaro tashkilot xalqaro savdoni bo‘g‘uvchi milliy proteksionizmning hukmronligi davrida paydo bo‘ldi. Shuning uchun ham har qanday, hattoki bojxona to‘siqlarini olib tashlash yo‘lidagi chegaralangan qadam shu davrda juda katta yutuq hisoblangan. Faqatgina o‘tgan asrning 50-yillarga kelib tadqiqotchilar erkin savdo hududlarini va bojxona ittifoqlarini tashkil etish shubhasiz dunyo miqyosida erkin savdo paradigmasidan chekinish ekanligiga jamoatchilikning diqqat-e‘tiborini qarata boshlashdi.

Integratsiya – integratsion guruh ichida erkin savdoning maksimal rivojini, lekin shu bilan birga ushbu guruh va tashqi olam orasidagi proteksionizmning kuchayishini anglatadi. Shu sababli,

MUNDARIJA

Kirish.....	3
1-bob. Xalqaro iqtisodiy integratsiya – jahon iqtisodiyoti va xalqaro iqtisodiy munosabatlar tizimida	7
1.1. Xalqaro iqtisodiy integratsiyaning mazmuni va mohiyati.....	7
1.2. Iqtisodiy integratsiya: nazariy qarashlar tahlili.....	15
1.3. Xalqaro iqtisodiy integratsiyaning jahon xo‘jaligi va xalqaro iqtisodiy munosabatlar tizimida tutgan o‘rni.....	26
1.4. Xalqaro iqtisodiy integratsiyaning jahon markazlari – G‘arbiy Yevropa, Shimoliy Amerika, Osiyo – Tinch okeani mintaqasi.....	31
2-bob. Xalqaro iqtisodiy integratsiyaning xususiyatlari va milliy davlatlar iqtisodiyotiga ta‘siri	47
2.1. Xalqaro iqtisodiy integratsiyaning rivojlanish shakllari.....	47
2.2. Xalqaro ishlab chiqarish va ilmiy-texnik hamkorliklarning rivojlanish xususiyatlari va asosiy ko‘rinishlari.....	54
2.3. Jahon iqtisodiyotida integratsion jarayonlarning ijobiy va salbiy jihatlari uning milliy davlatlar iqtisodiyotida tutgan o‘rni.....	57
3-bob. G‘arbiy Yevropada integratsion jarayonlarning rivojlanish tendensiyalari	65
3.1. Yevropa Ittifoqining shakllanishi va uning rivojlanish bosqichlari.....	65
3.2. Yevropa Ittifoqining boshqaruv tuzilmasiga tavsif.....	70
3.3. Yevropa Ittifoqida yagona valyuta tizimining shakllanishi.....	73
4-bob. Shimoliy Amerika mintaqasidagi integratsion jarayonlar	81
4.1. Shimoliy Amerika erkin savdo hududi to‘g‘risidagi kelishuv (NAFTA)ga a‘zo davlatlarning jahon xo‘jaligida tutgan o‘rni.....	81
4.2. Shimoliy Amerika erkin savdo hududida integratsiyaning rivojlanish xususiyatlari.....	89
5-bob. Jahon xo‘jaligidagi xalqaro ahamiyatga ega bo‘lgan global tashkilotlar	98
5.1. Xalqaro iqtisodiy ahamiyatga ega bo‘lgan tashkilotlarga umumiy tavsif.....	98
5.2. Birlashgan Millatlar Tashkiloti va uning tasarrufidagi iqtisodiy tashkilotlar.....	99
5.3. Jahon xo‘jaligida ijtimoiy-iqtisodiy faoliyat sohalari bo‘yicha birlashgan tashkilotlar.....	102
5.4. Xalqaro iqtisodiy munosabatlar tizimida moliya-valyuta sohasini, sarmoyalarni himoyalash bo‘yicha xalqaro iqtisodiy tashkilotlar.....	104
5.5. Jahon savdo tashkiloti xalqaro iqtisodiy munosabatlar tizimida.....	114
6-bob. Mustaqil davlatlar hamdo‘stligi doirasida integratsion jarayonlarning rivojlanishi	130
6.1. Mustaqil davlatlar hamdo‘stligining tashkil topishi va rivojlanish xususiyati.....	130
6.2. Yevrosiyo iqtisodiy hamjamiyati doirasida integratsiyalashuv xususiyatlari.....	139
6.3. O‘zbekiston Respublikasining MDH doirasidagi hamkorligi.....	150
7-bob. O‘zbekiston respublikasining jahon xo‘jaligiga integratsiyalashuvi	165
7.1. O‘zbekiston Respublikasining jahon xo‘jaligi tizimiga integratsiyalashuvi yo‘nalishlari.....	165
7.2. O‘zbekiston Respublikasi jahon iqtisodiyotiga integratsiyalashuvi sharoitida tashqi savdoning rivojlanishi.....	174
7.3. O‘zbekistonning mintaqaviy integratsion markazlar mamlakatlari bilan hamkorligi.....	182
7.4. O‘zbekiston iqtisodiyotida xorijiy sarmoyalar.....	195
Adabiyotlar ro‘yxati.....	214
«Xalqaro iqtisodiy integratsiya» fani bo‘yicha yozma ish variantlari.....	227
«Xalqaro iqtisodiy integratsiya» faniga oid atamalarning izohli lug‘ati.....	249